

VENDIM
Nr. 715, datë 26.8.2015

PËR KRIJIMIN E SKEMËS “VOUCHER”

Në mbështetje të nenit 100 të Kushtetutës, të neneve 6 e 7, të ligjit nr. 8957, datë 17.10.2002, “Për ndërmarrjet e vogla dhe të mesme”, të ndryshuar, të neneve 5 e 7, të ligjit nr. 10303, datë 15.7.2010, “Për krijimin dhe mënyrën e organizimit dhe të funksionimit të Agjencisë Shqiptare të Zhvillimit të Investimeve (AIDA)” dhe të ligjit nr. 160/2014, “Për buxhetin e vitit 2015”, me propozimin e ministrit të Zhvillimit Ekonomik, Turizmit, Tregtisë dhe Sipërmarrjes, Këshilli i Ministrave

VENDOSI:

1. Krijimin e skemës “Voucher”, më poshtë “Skema”, me vlerë të përgjithshme 9 000 000 (nëntë milionë) lekë, për një kohëzgjatje zbatimi 3 (tre) vjet, për periudhën 2015–2017. Skema fillon të zbatohet në vitin 2015, me këtë shtrirje kohore dhe sipas vlerave të mëposhtme:

- a) Për vitin 2015, vlera e fondit të jetë 1 000 000 (një milion) lekë;
- b) Për vitin 2016, vlera e fondit të jetë 4 000 000 (katër milionë) lekë;
- c) Për vitin 2017, vlera e fondit të jetë 4 000 000 (katër milionë) lekë.

2. Skema, përveç fondeve nga buxheti i shtetit, të parashikuara në pikën 1, mund të ketë si burim financimi edhe donatorë të ndryshëm apo institucione financiare ndërkombëtare.

3. Skema u jep ndihmë, në formë granti të drejtpërdrejtë, ndërmarrjeve mikro, të vogla dhe të mesme, nëpërmjet bashkëfinancimit. Në varësi të vlerësimit për projektin e dorëzuar nga aplikanti/tët, skema mbulon 85% të kostove të pranueshme nga buxheti i shtetit, por jo më shumë se 350 000 (treqind e pesëdhjetë mijë) lekë.

4. Objektivi kryesor i Skemës është stimulimi i ndërmarrjeve mikro, të vogla dhe të mesme, që operojnë në fushën e prodhimit, përfshirë agroindustrinë, si dhe prodhimin e programeve kompjuterike (software TIK), për t’u mundësuar atyre transferimin e drejtpërdrejtë të njohurive, nga ofruesit e shërbimeve, për inovacione, teknikat e marketingut, duke ofruar përvoja dhe praktika më të mira, që nuk janë aplikuar më parë te kompania aplikuese dhe që do të ndikojnë në rritjen e konkurrueshmërisë dhe performancës ekonomike të saj.

5. Qëllimi i Skemës është rritja dhe zhvillimi i aftësive menaxheriale dhe teknike për krijimin e produkteve të reja, proceseve ose shërbimeve inovative, si dhe mundësimi i krijimit të një lidhjeje të vazhdueshme me ofruesit e këtyre shërbimeve.

6. Kostot e pranueshme që mund të bashkë-financohen, përfshijnë ato për:

- a) zhvillimin e produkteve të reja, përmirësimin e produkteve ekzistuese;
- b) aplikimin e proceseve të reja teknologjike apo të përmirësuara të prodhimit;
- c) përmirësimin e hallkave të logjistikës dhe sistemeve të marketingut;
- ç) zhvillimin e një modeli të ri biznesi ose strategjie zhvillimi, që premtan rritje të performancës;

d) testimin eksperimental.

7. Nga skema “Voucher” përfitojnë ndër-marrjet që plotësojnë, veçanërisht, kushtet e mëposhtme:

a) Janë biznese të klasifikuara, si: mikro, të vogla apo të mesme, sipas ligjit nr. 8957, datë 17.10.2002, “Për ndërmarrjet e vogla dhe të mesme”, të ndryshuar;

b) Kanë selinë e tyre brenda territorit të Republikës së Shqipërisë;

c) Prodhonë produkte dhe/apo ofrojnë shërbime në Shqipëri, të cilat tregtohen brenda dhe/apo jashtë vendit;

ç) Janë të regjistruara në QKR dhe nuk kanë detyrime tatimore;

d) Nuk janë në proces falimentimi ose në procedurë likuidimi;

dh) Plotësojnë kriteret e legjislacionit të ndihmës shtetërore;

e) Operojnë në sektorët e prodhimit, përfshirë agroindustrinë, si dhe prodhimin e programeve

kompjuterike (software TIK), që premtojnë rritje punësimi dhe produktiviteti;

ë) Provojnë se operojnë në treg prej jo më pak se një viti;

f) Nuk kanë më pak se 3 (tre) të punësuar;

g) Janë të hapur dhe ofrojnë informacion për vlerësimin dhe impaktin e projektit, për fazën e parë, brenda 6 muajve dhe, në vazhdimësi, brenda 3 vitesh pas përfundimit të projektit.

8. Ofruesit e shërbimeve, në zbatim të kësaj Skeme, klasifikohen në:

- institucione/organizata publike/private të kërkimit shkencor/institucione të arsimit të lartë, vendëse ose të huaja, publike ose private;

- shoqëri konsulence dhe trajnimi, individë, që të jenë të regjistruar, sipas legjislacionit në fuqi.

9. Koha maksimale për të siguruar konsulencën dhe transferimin e njohurive të jetë 45 ditë.

10. Për efekt të zbatimit të kësaj Skeme, Ministria e Financave, nëpërmjet degëve të thesarit, të pajisë me “Voucher” (kuponin e garancisë së pagesës së shërbimit) AIDA-n, aplikantin fitues të skemës dhe ofruesin e shërbimit, kundrejt kontratës së nënshkruar ndërmjet aplikantit fitues dhe ofruesit të shërbimit.

11. Paga për ofruesin e shërbimeve të realizohet nga vetë aplikanti fitues i Skemës, të cilit, me përfundimin e projektit, i bëhet rimbursimi i vlerës, kundrejt kuponit “Voucher”, nëpërmjet sistemit informatik financiar të qeverisë dhe kundrejt paraqitjes së dokumentacionit justifikues të shpenzimit.

12. Procedurat e aplikimit dhe kriteret për përzgjedhjen e përfituesve e ofruesve të shërbimit përcaktohen në rregulloren e funksionimit të skemës “Voucher”, e cila miratohet me një urdhër të përbashkët nga ministri përgjegjës për ekonominë dhe ministri i Financave.

13. Për menaxhimin e skemës “Voucher” ngarkohet Agjencia Shqiptare e Zhvillimit të Investimeve.

14. Efektet financiare që rrjedhin nga zbatimi i këtij vendimi përfshihen në buxhetin e ministrisë përgjegjëse për ekonominë, e cila krijon një zë të veçantë për këtë qëllim, për llogari të AIDA-s.

15. Ngarkohen Ministria e Zhvillimit Ekonomik, Turizmit, Tregtisë dhe Sipërmarrjes, Ministria e Financave dhe Agjencia Shqiptare e Zhvillimit të Investimeve për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama